

Memoje  
de un figgiu:  
regordi  
de un vegio zeneise...

## CAFFÈ E PUNTI DE RITREUVO A ZENA INTI ANNI TRENTA

di Enrico Carbone  
"RICE"

**M**e rifasso a un'antiga memoia. Pueivo avei quattro o cinque anni: mae mamà e unna sò amiga, a scia Norcia, s'éan incontrae a De Ferrari pe piggià o the a-o tea room de l'*Hotel de Genes* a-o cian terren do palazio ch'o fa angolo con o caroggio da Cazann-a (oa gh'é 'n'agensia do Banco de Ciavai).

Me faxeiva imprescion vedde a gente passeggià in scio marciapè a-o de là da vedrinn-a. A maexima imprescion l'ho provà a Parigi mangiando in sci *boulevards* tanti anni dopo.

In ciassa De Ferrari i caffè gh'éan abbreitto.

Into maeximo palazio de l'*Hotel de Genes* gh'èa alloa Cassanello, 'na bella pasticceria che fra quarche anno a l'avieiva lasciòu o posto a Capurro, un grande locale con poltronn-e e tavolin; in-çimma a-o caroggio da Falamonica Capurro o l'aveiva misso sciù a tavernetta (ancheu *nigh*) pe i tia-tardi.

Capurro o l'éa ascì in via Corsica co-i tavolin al-l'averto.

Inti fondi do Banco de Romma, sempre in Falamonica gh'èa o Ristorante Perelli ben ben renomòu; ma o l'ha dovùo lascià o posto a-o garage da banca.

Sotto o livello da ciassa un bar pe gente de passaggio servia in pè.

Un po' ciù in là, into palazio dove gh'èa o SECOLO XIX, doppo Oscar Linke e 'n'atra buttega, me pa de libbri, *un vero e proprio american bar*

